

小倉山房詩集卷十一

乙亥

錢唐袁枚子才

立春後三日孫叅戎贈桃核三升雨中撒種賦詩

言謝

剛開病眼試春風便撒河陽種一叢花發待嘗千日酒  
山寬容得萬枝紅輕鋤照影波初綠好事迎人雨自東  
明歲將軍駐旌節公門桃李此園中

謙齋印譜歌

謙齋印譜古所稀譜成命我一歌之我作才語非阿私  
爲古混沌書其相先生古貌清且奇鎖頤折額毛鬚鬚  
東揭西摩靡不爲佞廬沮誦笑且窺穆王所刻宣王垂

周秦盃商尊彝三符六鳥蠶與龜速狼躔鹿爾雅詞  
以井爲闢墨作池以指畫肚窮孜孜先將六體探其微  
後以萬本驅其疵青石觸手成秦碑一刀初落追李斯  
二刀再入掃張芝三刀四刀萬馬馳太阿斬斷珊瑚枝  
神龍摩却千熊鬚翻翻鴻鶴行且飛芄芄黍稷紛難披  
縱者欲懸橫者低肥或如瓠瘦如欹唐印如筋宋印絲  
惟公兼之孰與媿我聞竟陵王所疑刻符摹印無分岐  
楚金非之作繫辭部居別白窮銖銜今之私印古所治  
龜頭左顧孔愉嗤犬字外向伏波悲昔人於此爭毫釐  
三倉爰歷書無涯皇皇炎漢嚴其儀尉律太史擁臯比  
九千籍試公卿兒曹瞞老姦何所知猶懸鶴書帳中嬉

惜哉先生不遇時無人薦之軒與義刻劃金石追龍威  
泰山瑯琊空巍巍所逢公卿多穿鎚新羅國人來又遲  
立本呼作老畫師惘空笑殺長康癡鐫勒使者非所司  
凌雲閣上誰相思斃斃白髮江之涓巖家俄隸苦欲飢  
愧我說文讀若迷斷碑爛鼎堆堦堦口稱艾艾呼期期  
見公之譜涎滿頤捧出銅玉光離離索公一字酒一卮  
仲春填篆花作媒願公壽考永不違

病

病來無事不蹉跎一任堂堂白日過睡早忍將明月別  
起遲驚看落花多

尹宮保使人問病且探往見日期因以詩答

支筇要試春來健擬過師門第一家久閉山中如處女  
翻疑簾外卽天涯琴孤自落空庭雪梅老常開隔歲花  
若見南州徐孺子先生只可問桑麻

送李晴江還通州

才送梅花雪滿衣畫梅人又逐花飛一燈對酒春何淡  
四海論交影更稀往事隨雲風裏過綠陰似水馬頭圍  
白門賸有三君號沈約顏唐李愿歸

白下稱余與晴江  
補蘿爲三君

署得新衙桑苧翁兒孫迎出落花風閉門展卷千秋在  
傍海爲家萬象空錦里故人排日飲桃源流水滿村紅  
回頭應問張宏靖丁字何如兩石弓

小倉山下水潺潺一个陶潛日閉關無事與雲相對坐

有心懸榻竟誰攀  
鴻飛影隔江山外  
琴斷音留松石間  
莫忘借園親種樹  
年年花發待君還  
晴江所寓號借園

三月二十四日答尹宮保手書

東風吹散滿庭烟  
接得郇雲五色箋  
問我山中春在否  
知公物外意蕭然  
讀書身健終爲福  
種樹花開也是緣  
笑語天桃同芍藥  
尚書念汝夕陽天  
來書云天桃已謝芍藥將開子才慮想全愈

春興五首

小倉山爲一家青  
繞向吾廬作畫屏  
病起翻書如訪舊  
春來養竹勝添丁  
幽蘭九畹披香坐  
啼鳥雙柑帶笑聽  
半角湘簾鈎暫捲  
楊花隨客入空庭

身居宏景三層閣家住香山八節灘  
愁踐落花時讓路愛生春水獨憑欄  
朱藤架老蜂喧早薜荔墻高蝶過難  
呼與園丁作值約幾痕新雨試魚竿

心事山居日日幽風廊水榭足閒遊  
侵晨試墨書蕉葉趁月彈琴上竹樓  
雙隊飛時知蝶喜十分開處替花愁  
鸞臺婢子解人意勸放神仙藥玉舟

蕭蕭水木湛清華萬綠浮空塔影斜  
屋漏引來書帶草家貧開瘦牡丹花  
無求每覺人情厚有命方知我志差  
權作神仙天際想北廳跂脚鼓琵琶

碧雲英與玉浮梁酌向花神奏綠章  
謚作洞簫生有願化爲陶土死猶香  
春光解戀身將老世味深嘗興不在

愛殺柔奴論風物此心安處卽吾鄉

### 行路難

行路難難何處九關虎豹疑疑角不聞雷霆勝刀鋸三  
塗四嶽稱嶄絕不聞壯士思歸去行路難難莫難于進  
洞房古來斯養卒乃嫁邯鄲倡難莫難於遊天閭龍伯  
大荒苦束縛蚿人九寸偏翽翽女媧補天天不喜星辰  
錯落本如此鳳凰麒麟何有哉夸父空行三萬里勸汝  
一杯酒爲汝前致詞孔子無儀同將軍堊伯夷王莽學  
周公相去亦幾希時哉時哉山梁雉聖人奉之爲神師  
何況任防文章士低心紆意梅蟲兒涼州崔公亦名士  
小靳十萬夫人嗜賈誼彌衡少年不解事乃對鵬鳥鸚

鷓鴣涕下如綆糜富不必師史與橋桃但須煮海求錢刀  
貴不必許史與金張但須祖籍居南陽李廣受奇禍衛  
青有成功心不以爲然大書太史公朕且用康晉而况  
牛仙客公然高力士慷慨奮筆舌草無端而霜水何故  
而烟伏羲六十卦未濟終其篇衛侯悅支離人脰多肩  
肩已焉哉屈子問天天漫漫鄒衍吹律律更寒不如請  
君去郢模三十字沈去秦瓊刀箭搬來聽我歌行路  
難行路難空長歎

與劉介石夜飲得天字

故人招我赴華筵同倚梨河試管絃雨過一峯生水上  
風高雙蝶墜尊前泛舟妓訪金陵子對酒詩歌玉局仙



策馬夜歸街柝滿空山孤月正當天

題慶雨林詩冊并序

甲戌春在清江爲雨林公子書詩一冊隔年公子隨宮保渡江余病起入見見甌北趙君題墨矜寵不覺變慙顏爲欣矚重書長句呈公子並

呈趙君

愧舞瞿曇甘蔗梢趙題有前番猶是蔗梢頭之句久焚筆硯學君苗自無官後詩才好但有春來病卽消海內芝蘭憐臭味鈞天絲竹奏簫韶何時同作蕭郎客君奪黃標我紫標

春日卽事

一采芙蓉病半年芒鞋初試雨花天誰將漆葉青粘飯

贈與樊阿作地仙

樵青婢子僕魚童  
書庫池西粟廩東  
四面春蘭半簾雨  
一琴橫放坐當中

夢雨迷離兩鬢斜  
鶯啼紅日上窗紗  
客來知道先生睡  
代向春山掃落花

不伐櫻桃學姓蕭  
不教修竹勁芭蕉  
生憎棲鳳梧桐樹  
最晚迎春最早凋

高堂白髮愛青春  
萱草含風護寢門  
更種合歡花一樹  
教兒知道有晨昏

山妻解作鎖雲鬟  
嬌女能燒迷迭香  
千盞銀燈照花睡  
夜深何處不紅粧

小回中外小眠齋淺碧深紅次第排  
苦費平章風月手  
自標花隊寫牙牌

谿刻由來最惱公  
仙家服食自從容  
士安高士分明在  
不數夷齊及兩龔

花陰深護一堂雲  
酒置清明待客醺  
不飲但教山上望  
勸人行樂有孤墳

二月天桃攔路開  
一枝筇杖踏青回  
山行偏愛逆風立  
花片撲人如雨來

惜玉詩

有序

余性耽古玉得復散去最愛者瑗一璧二玉蟬  
四田堯印一鱗一兔一琫二客夏爲利市三倍

又都次拾僅留翁仲斷珊瑚玦李騰印瓊柄而  
已宋李伯時有此癖共瓊琬一十六雙散於身  
後然則余遠或過之而好猶未也思往念存詩  
能已乎

得寶歌殘曲一章摩挲銅狄尚思量萬般聚散前緣定  
何必瓊現泣數行

物縱無情我有情殘花賸蕊更分明公卿莫笑階趨慢  
玉珮瓊瑤自一生

平生

平生頗識嫦娥貌兩度曾經到月宮容易有身天地內  
可憐無分古人中悠悠女嫁男婚事脉脉朝南暮北風

且幸尊鱸心願足步兵今已住江東

移家入隨園

司空有谷號王官新製瓜廬十笏寬性癖嬾居臨市宅  
親衰不戴遠遊冠貧家擔石張羅易荒地樓臺草創難  
愛殺夏清侯傳在千竿日日報平安

估客樂

生不登巴寡婦家懷清臺死不見張燕公三十六鑑鑄  
橫財徒然長劍挂頤事玉階何不早同估客乘船歸去  
來百萬一紫標千萬一黃標蕭郎勝叔都解事麻繩滿  
屋風蕭蕭望春樓下烟花繞二八嬋娟歌得寶聽到揚  
州銅器多三郎顏色今朝好莫勒燕然銘休鑄蠻溪柱

小臣有絹萬丈長繞還陛下南山樹

仲夏九日高淡懷方伯鳴騶枉顧

一徑寒雲鎖竹齋中丞呵止忽籠街隣翁指唱高軒過  
上客偏憐小住佳深樹流鶯窺羽蓋夕陽歸騎挂松欒  
依然五月撥公駕重使騷人動古懷

平臺成

山頂一臺成青天明月驚似爭廣寒坐欲馭曉風行四  
角紅闌穩三秋碧落清從今雙眼濶處處見雲生

製小艇

一个舟如葉飄然秋水天初登波未穩學盪槳猶偏拾  
翠春塘月浮花日暮烟朝來忘繫纜吹過畫橋邊

削園竹爲杖

自踏秋林雨，攜來竹一枝。似龍頭轉曲，作杖手相宜。香  
遠尋花健，春慵步月遲。從今幾緇屐，惟有此君知。

毀門進古松

松也如高士，門低不肯來。蒼髯臨暮入，蓬戶爲君開。綴  
石分標致，張燈自剪裁。充闔真有慶，仗爾後凋材。

引流泉過水西亭

水是悠悠者，招之入戶流。近窗涼易得，穿竹韻偏幽。洗  
手弄明月，浮觴記小籌。濛濛真可樂，魚影一庭秋。

六月十一日紀寒作

六月披裘者，高風恐未真。今年三伏日，沿路見斯人。無

定炎涼事難調老病身篋中紈扇泣時過尚橫陳

遲彈琴道士不至

立盡碧梧影橫琴不見君酒涼千樹竹花散一溪雲  
海上水仙遠寒空雁翅分移情向何處孤鶴唳離羣

閉中

搖竹一身雨摘花滿手香自離城市遠只覺歲華長  
舊墨磨頻仄新絃爪易傷閉中叅物理獨立咏蒼茫  
雨過一蟬鳴空廊坐有情人衰秋雁語花老蜜蜂聲  
水曲如招隱山高亦近名終當率妻子郊外事躬耕

千石

千石瀨波一釣磯暮寒催我着蓑衣深堂有雨琴先潤



秋樹無風葉自飛  
月下烏棲花影重  
雲中僧定磬聲希  
幽懷擬學唐盧愨  
官愛靈昌竟不歸

六月十四日尹宮保過隨園

小隊弓刀過野田  
八騎鳴向綠楊邊  
穿雲覓遍花間路  
刪竹教通林外天  
坐久紅旗飄細雨  
歸遲喬木起蒼烟  
尚書回首登臨地  
流水聲中二十年

野人籬落賜評量  
愛殺風琴響石牀  
門小原非迎上客  
樓高貪得見江光  
公嫌門小樓高碧紗籠久詩箋淡  
紅藕花深帽影涼  
慚愧公卿識名姓  
未曾逃去學韓康

宮保和詩

十頃梅花百畝田  
結廬恰傍碧山邊  
不因小憩尋前

路誰信仙源別有天立馬驚啼棲樹鳥穿林惹散隔  
溪烟依稀遊屐曾過處回首風塵不記年

環池結構細商量花滿閒堦書滿床暫倚危欄看野  
色紛排畫戟對巒光亭高只覺千峯小水近能教六  
月涼誰似林泉多暇日芒鞋竹杖總安康

疊韻再和

愛向溪山買薄田騷人住老白雲邊高樓獨上更深  
月小艇輕搖雨後天時爲花開穿竹逕偶因客至屢  
茶烟瀛洲得似幽居否同話西窗感昔年  
漫把浮沉再較量夫容深處置匡床捲簾風好迎朝  
爽把酒杯寬映水光老樹千株憑錯落名山一角占

清涼須知膝下晨昏好拈管還爲咏壽康

夜過借園見主人坐月下吹笛

秋夜訪秋士先聞水上音半天涼月色一笛酒人心響  
過碧雲近香傳紅藕深相逢清露下流影濕衣襟

道有飛瓊贈琴來我不知

道有許姓者見贈古琴已送隨園

多慚青玉

案遠寄白雲司湖色明高樹秋痕散竹枝三更揮手別  
心與七絃期

日日

日日桃花洞裏行鶯啼燕語已忘情聽來絲竹愁仍起  
作到神仙味亦平精力儘消文字障史書先讓貴人名  
閒身頗覺垂垂老不關心兵鬪墨兵

書懷

烟雨蕭蕭草一廬百年心事付歸歟不希釋梵天王位  
肯讀司空城旦書花影乍離春夢後酒痕重拂故衫餘  
琵琶槽斷秋娘老淚滴琴河水不如

自折黃梅雨一巾分花疏竹總精神無情何必生斯世  
有好都能累此身日飲爰絲真達者傳餐陸賈是天民  
饒他細數唐堯後高士名傳九十人

陶通明

陶通明初時騎馬後吹笙若非求祿偶乖舛何由得入  
金華庭燒成金丹似霜雪得者服之都長生一書獻上  
梁天子焚香拜奉如仙經心知太清三年事不肯生子

羅刀兵俗人不知空解夢青龍無尾天中行

醉歌

蒼蒼者天悠悠者土夷齊思黃農黃生薄湯武漢後無  
文章唐後無詩賦一言以蔽之今人不如古天何爲今  
必使古人亡今人補滄海橫流至何所我欲排闥闔奪  
雷斧向天言之天毋怒死者吾欲追生者吾欲阻西施  
毛嬙常爲妻后夔師曠仍擊鼓但生牛莫產虎寧無孫  
莫棄祖時則春王樂則韶舞將見五行調八荒撫皇天  
安安享牛脯又何必擾擾紛紛更十二萬年而換一盤

古

重九後三日尹宮保諸公子過隨園

門外蕭蕭珂馬音一羣公子踏秋林相逢露葉風簾下  
小試平沙半出琴

真似青天雁幾行川公子穿雲掠水過回塘碧闌干外  
秋衫影都與芙蓉一樣長

天風高閣接流霞賈勇齊登眼欲花笑指雲中郎見否  
紅旗飄處是郎家登閣見制府牙旗

秋老重陽碧沼鮮空山蟲語一林烟到來從騎隨風散  
偷弄神仙采藥船

傷桐

高桐倚西岩其下多牡丹花露爲桐掩主人心不懼伐  
桐摧燒之使露爲花專果然三春花妖妍皆可觀亡何

秋陽來如火暴庭軒牡丹焦而枯主人嗚且煩回思欄  
在時豈使耆能然意欲補栽之枝小蔭亦難當時牡丹  
開花不滿一旬于今大暑至匝月方游臻主人悔次骨  
受熱無一言

卽事

黃梅將去雨聲稀滿徑苔痕綠上衣風急小牕關不及  
落花詩草一齊飛

王郎詩并序

溫皆山吏部愛歌者王郎嫌賢弟宰上元關防  
拘闕其同年莊念農儼河房近郎戲曰從我而  
朝少君溫善甚邀余與吳蘭臣汪秋畬等稱媿

前行且飲申且後止溫書詩冊如蠶眠納王郎  
袖諸公酬之

一樹涼燈萬瓦霜四年重到舊歌場板橋添个旗亭事  
齊唱王郎曲四章

自是王孫解愛才故教雙姓使君猜郎姓王又姓孫衍波箋紙  
真珠字便是溫家玉鏡臺

青溪咫尺路難通阿弟琴堂最惱公苦勸莊生居北郭  
王昌消息近墻東

我有閒情海內知連宵偏和國風詩紫雲艷極紅牙脆  
那可夢無杜牧之

再依前詩之數贈念農



二年穿老綠蓑衣鎮日悠悠坐釣磯爭奈前生是蝴蝶  
莊周來後入城飛

豐貂軟雪女東小院銀燈闌水紅別墅酒旗花艷處  
賣珠兒作主人翁

湖海元龍氣未降揮毫同倚舊吟窗秦淮水上如珪月  
照見才人影又雙

征驂可記楚江頭露葉霜燈話未休君正風波儂正病  
隔年秋爲兩家愁

哭陶姬

姬亳州人工楷善繡癸亥來歸生一女名成兒  
今年八月四日病亡

孤花一樹晚風凋宛若神君未易招十二年來涼月色  
照人春夢盡今宵

去年秋雨病相如累汝殘燈兩月餘今日西風儂轉健  
玉釵聲斷夜窗虛

製曲空教嘆百年玉膏紅蜜總如烟生憎江上無情水  
只載鴛鴦兩度船

開箱遺墨臉簪花不見彈棋指爪斜惟有幌繫針線迹  
壓郎腰下尚鮮華

琴聲不奏楚明光夢短從來恨轉長腸斷左家嬌女小  
麻衣低掃一簾霜

鎗花吹影滿庭秋但說他生事總休半夜啼烏兼斷雁

一齊聲下楚江頭

送尹雨林之長安補拜唐阿

西園公子羽林郎  
典謁年同張辟強  
雞舌乍含天對語  
唾壺學捧手生光  
吹來雲外飛龍引  
騎去長安金鳳凰  
只有故人深惜別  
芙蓉江上唱河梁

山隣翟雲九孝廉招聽羽士彈琴

賓主一山隔  
相招聽七絃  
風吹秋在屋  
琴送月當天  
清露洗紅葉  
晚花明白蓮  
歸來雙耳冷  
餘韻尚悠然

尹六公子花燭詩

冰泮風和臘轉時  
鸞笙鳳管玉參差  
尚書婚嫁人間說  
開到瓊花第六枝

教持班管自催粧不許簫聲累鳳凰是日不用樂要看雀盧

好奩贈十三經歷女兒箱

蕭郎風貌最清華捲幔東方正曉霞半夜珠燈照涼雪

一重春護一枝花

不須春思繞城南公子九日春光獨早探郎若畫眉春

有樣新年眉月在初三

郭令家風總愛才償詩宮錦可先裁添箱更贈嫦娥線

繡出平原公子來

有借朝衣者戲題一詩與之

柳州難起鱉浮圖久把朝衫質酒壚弓弛更張弦亦朽

舟橫不渡棹俱無

過王禹言太史舊宅

當街方策馬到眼忽魂消昔我來江上斯人抗手招梅  
花窗下榻楊柳水邊簫不是前生事山河夢已遙

徹夜談三鼓全家酒一庭柳枝償婢價銀鹿贈奴星太

史太代聘吳姬以華屋人何在秋江笛早聽今朝門巷過腸

奚奴見贈斷暮山青

哭襄勤伯鄂公

安西都護遠防邊信斷陰山雪後天降虜一朝擐甲起  
孤軍萬里受鋒先 龍顏有淚三臨奠馬革無尸半裹  
烟麾下殘兵歸間道口含心史向人傳

聽築長圍幾萬重將軍匹馬獨臨戎天山掃雪兵猶戰

青海啼烏帳已空  
拜表淚留秋草上  
彎弓絃斷夕陽中  
男兒欲報君恩重  
死到沙場最善終

前年制府看山時  
曾過衡門立馬遲  
壁上吟詩喚才子  
花間招隱駐旌旗

公過隨園門外嘆曰烟景太佳此人必為山林所誤

燉煌遠道

陳湯去結費要盟  
柳渾知回首孫宏  
東閣冷哭君兩世  
益凄其

得張白雲先生集

難期著述傳身後  
且把遺書訪舊人  
同是一生辛苦事  
九京知也淚沾巾

書懷

我不樂此生忽然生  
在世我方樂此生  
忽然死又至已

死與未生此味原無二終嫌天地間多此一番事

禽獵可以烹只坐無所知鸚鵡苟能言人多珍豢之人  
而不好學佹佹如行尸何不肆微勤潛心書與詩

鐘鼓聲喧闐其旁寢可安隔牆聞呻吟終宵爲不懽狂  
颺四野來當之了無害壁罅射涼風如芒刺難耐卽此  
可悟道行行有所思汝穎利如錐君子不屑爲陳寵賜  
椎成君子愛其名

五聲徵音廢四瀆濟水窮八音匏響絕六典冬官空天  
地無全用聖人無全功胡爲蚩蚩氓卜卦專求豐與其  
矜榮華一過如飄風何不留不足徐徐俟其終古人數  
五福子不在其中所以東門吳無子與有同

編得

編得新詩十卷成自招黃鳥聽歌聲  
臨池照影私心語不信吾無後世名  
不負堂堂白日過卷中一字一編摩  
及時行樂春猶少惜墨如金集已多

古意二首

美人看花去忘却身是花花如有所知  
願聞美人家母爲俗父妻寧作所懼妾  
不見甘蔗生枝枝從旁出



小倉山房詩集卷十二

丙子

錢唐袁枚子才

許滄亭觀察亡逾年矣家不戒于火遷柩南郊孟  
亭太守招同人載酒爲安其靈

一盃麥飯出南門都是遽園舊酒人里析有災空引轎  
夏侯無客不沾巾生前華屋花長閉城外清明鬼亦春  
腸斷江頭王武子黃公墟下說音塵

過錫山訪稽少宰不值

久別春風意惘然一朝船到戟門前蒼頭覓主無尋處  
紅樹留人有晚烟想戴豐貂采靈藥可留餘夢入鈞天  
輸公色養真清絕菽水名山第二泉

繡衣前歲駐山陽團扇題詩寄數行  
細雨吹燈春夢遠  
嬌鶯啼月落花涼  
當時燕子棲華屋  
此日閒雲過草堂  
愁見絳帷廬子幹  
季長絲髮已蒼浪

公子承謙從余授

引鳳曲有序

庚午秋余避瘴蘇州或繩張校書女閩獨絕矚  
之則擁髻疑立妙婧流靡自言小字阿鳳生十  
九年迎歸秋齋隨郎轉側亡何搗母來黝歸淚  
泫泫下問欲留乎不答問他郎何以不如是亦  
不答贈赤劍袖巾色然而耻作河間姹女旣  
別不知所往今年春余再過吳鄭叟者指天台  
山有桃花不知劉阮故舊雨旣見各齒擊曰是

也喜且悲誦前詩畧皆上口少選屏人曰能爲  
妾道地者君也肯畜鳳耶當以傅婢禮見肯好  
鳳耶當以女弟禮見人壽幾何君忍一再誤耶  
余書楚人稱媼調之鳳無奈何乾笑再拜適故  
人劉魯元趙文山官其地而秀才戴右麟有下  
達之託訟言其故答寄報遂之六月九日執燭  
前馬婚于戴氏余讀會真記常怪微之悔過有  
不終之恨然則如余之以不終終之者較於微  
之當何如也作引鳳曲一章

姑蘇城外三春水年年生長如花女半湑磯邊臨汝郎  
泛水尋花狂不已乾隆庚午六月初長陵小市駕輕車

迎來絳樹花同笑比到珠團玉不如雙瞳剪水鬢橫雲  
千蝶羅衫百鳥裙才共旗亭題畫壁更隨深巷駐雕輪  
自言家住橫塘口都知錄事聲名久彈箏慣唱小秦王  
舞袖能翻大垂手但看釵頭玉鳳凰兒家名字君知否  
二八芳年姝狡童浮花浪蕊日西東蕉葉有心空捲雨  
楊枝無力自隨風一朝曲被周郎顧碧鸞尾接銀河渡  
願作銜泥燕上梁休教落月烏啼樹碧玉回身抱滿懷  
可憐金玦易離開門前阿母香車至坐上啼痕滿面來  
此時無力唱回波此際情深可奈何不學丁娘索翠翹  
不封朱帛寄櫻桃只留一把相思淚當作珍珠兩處拋  
明朝重過碧雞坊銀漢紅牆事渺茫青鳥信沉劉禹錫

碧天腸斷冷朝陽十年阿軟重相見桃花依舊如人面  
雲雨襄王憶夢中王珉舊手存團扇說到滄桑我欲愁  
蕭郎萬里走涼州往日館娃餘蔓草新添小婢學梳頭  
殷勤苦把三生托惜花爭忍看花落振觸媧皇煉石心  
難禁子夜連珠諾定情代看水晶盤嫁女無如戴叔鸞  
下託長官劉子翼上求太守白香山昔日鴛鴦今鷓鴣  
蓮花度出污泥早換羽移宮總是春將姝改妹知誰好  
閨門萬口說因緣紅豆金筌播管絃劍墜龍淵雷拔地  
珠升滄海月當天惆悵當年范大夫西施網得贈東吳  
今朝位置傾城畢明日扁舟泛五湖

為王壽峯題問天圖倣玉川體

我聞秦宓言蒼天實有耳胡爲楚大夫問天天不理三  
千年後王郎來拔劍斫地顛如雷口存三寸不爛舌仰  
首只望天門開更有青雷子下筆巧安排畫作奇峰直  
上難尺五儼然漢武帝通天臺手攀星辰呼帝座笑  
殺赤章道士胡爲哉一部十七史欲問問何處且摘疑  
端三兩行清風吹入雲中去一牛享天天豈飽麤鼠食  
之不知惱荆退偏教虜馬來風起猶嫌殺人少試問謚  
之如何幾歐公如何考夏后善逢迎三嬪獻自天雨腸  
悉憑應上公祥靈怕逢薛孤延昂然操懿來配享文王  
后殺退避不敢前又何必重黎爲隔絕黔羸爲周旋臣  
請手斬九關豹身推阿香車白榆燒作玉樓墨銀河洗

畫筆底花三十六皇各獻狀羣疑滿殿願倚麻姑爬蝓  
有調語問外錯請將臣身賜喂金蝦蟆帝臺浮觴百神  
方醉忽聞讙言匆匆如畏萍號噴雨立六壘含星對道  
是問天天不答只恐萬年之後倚杵低蹇人上天都來  
爭此位天帝面方一尺有慚色乃召孔子謀孔子口稱  
不怨天恰呼喪子兩淚流且釣鯉魚逃亶州更召周公  
來命代天致詞衆人又言周公天妹所生天有私故把  
風雷驚破孺子疑不然剪爪沉河事已矣至今空自聽  
鴉鴟周公聞之只得斷噤陰喏如蒙俱正在支吾間忽  
有褒衣博冠者自稱唐臣柳宗元代天作對大書空道  
天者乃是太虛之積氣難捫難舐青濛濛雨師風伯傀

儻耳木強柴立隨癡龍奉行第一次混沌開闢所有之  
故事有如優人演劇不能小變通一切聖狂禍福風災  
鬼難各色目均是聚六州鐵鎔赤堊銅鑄成一冊作交  
代使玉帝搖手不得而后許登庸並非三科五行有生  
尅亦非天道幽遠如張弓並非仙丹佛力能挽轉亦非  
真宰忽醉忽明聰惟其事原板板故其形常夢夢君不  
見王莽請雷不能下魯陽揮日何曾東侵削龍伯不見  
短吹嘘火井何曾紅又不見石補勞女媧頭觸怒共工  
星隕驚梓慎月蝕愁盧仝自從開闢至堯舜雙九業已  
減至一分許何況四千年來減未終自家三百六十五  
度難料理那管人間乾啼濕哭諸沙蟲可笑世界海妄



窺靜輪宮在剝麒麟皮郊鼓擊逢逢碧天若有情早已  
老成翁太陽若下坐何以燭蒼穹譬如治家者尚且學  
痴蕪偶遺食餌魚鳥喜偶覆湯火螻蟻凶只緣人大物  
小難檢校人實無心任過功何況天關鑰匙藏在烟霄  
上清風一重雲一重赤縣神州九九八十一萬計中國  
渺小如螻蟻提向瀛洲賣不值錢半通那能刻雕省記  
勞化工汝何不解天覆飲天酒逍遙富媪游戲星童任  
黃頰之變青會聽剛須之生元蟲胡爲乎學楚狂所壁  
唇焦舌燥徒驚明月而惱春風王郎聞之心悶悶姑學  
聖人存不論且待十二萬年之後全局終再與徹底通  
盤作一問

過蘇州贈莊容可大中丞

朝 天闕說返巾車芳草萋萋梅熟初舊雨正停青雀  
舫新恩剛 賜紫泥書談深半夜甄長伯學重明時陸  
敬輿 長翰相期何以報爲公一讀一歎歎 賜詩有  
活斯民之句 速歸其善

牙旗紅閃夕陽明許住南樓客亦清

樓上題句請到南樓客亦稀

子花開春四面女兒香贈月三更心驚海甸哀鴻色腸

繞闕門打麥聲笑索官倉一囊粟故人今已是蒼生

隨園往歲駐征驂葉葉芙蓉露正酣同把科名憶年少  
各分吏隱占江南看山如我三間屋出拜輸公九歲男  
廿載留光風過眼雲龍角遂尚能堪

相逢花下一題襟買棹橫塘作越吟春酒玉堂天上夢  
清明遊子故鄉心人間努力留遺愛世外閒鷗聽好音  
莫忘棲霞山畔路碧雲紅葉共幽尋

約共遊舞山

還武林出城作

還鄉重出武林城天放湖光半日晴翠鳥衝烟飛雨後  
花枝當路勸山行采桑人少蠶猶小街尾魚多水正清  
三十年前舊遊處荒橋野店總關情

屢問前溪路幾重故鄉翻與異鄉同行人肩出菜花上  
村女臂彎桑影中兩岸茶青三月暮一絲髮白萬懷空  
傷心怕說南唐寺他日僧歸塔可紅

過葵巷舊宅

久將桑梓當龍荒舊宅重過感倍長夢裏烟波垂釣處  
兒時燈火讀書堂難忘弟妹同嬉戲欲問隣翁半死亡  
三十三年多少事幾間茅屋自斜陽

將歸白下別莊大中丞

閒雲偶過玉闌干曾費華堂兩頓餐今日春歸儂亦別  
新花攜上小船看

朱履平拖菜戟前江湖道術兩悠然不存半點雲泥迹  
恐犯初心愧昔賢

杜甫潭西久寂寥滄浪亭上兩回潮花間不唱高軒過  
知有憂民病未消

連宵風雨滯春寒不特花殘客也殘賦別江淹留贈語

得君容易得民難

歸舟回泊錫山喜晤拙修少宰別後却寄四十韻

小隱袁臨汝遺榮賀季真相逢端午節一笑惠山春集  
燕難忘主馴猿尚號賓廿年燈火夢萬里別離身杜鄴

兒從學林宗雨折巾慙非千里馬曾遇九方歎適館懸

方榻移齋近紫宸書聲槐市聽經義禮堂陳地煖花能

發風高翼各振有緣通世好無分接清塵枚出孫文定公門孫川

文敏賤子南征日先生珥筆辰飛觴澆末吏分俸潤行

人碧海翔孤鳳空江走弱鱗公才懷謝屐舊手失王筠

沙坂霜蹄駿鹽車獨角麟憶雲泥有意犯斗路迷津再

踏天街雪重污相府茵鬢鬢臣面改奕奕獸頭新令嗣

衣辭褥司農手算縉李膺方接席丕豹又投秦讀禮車  
仍返還山手更龜堂高甲子松影守庚申往歲黃河  
決勞公赤舄巡新詩團扇贈舊雨點心頻渺渺瑤華信  
飄飄弱水輪還朝歌瓠子贊化佐洪鈞爲奉潘安母歸  
尋張翰導江天揮白羽腰帶解黃銀春水潮痕潤沙堤  
草色勻兒時思釣弋膝下問羞珍觀樂應歛帽披貂更  
采蘋鶯花歸哲匠風月識宗臣笑我爲殘客先公作逸  
民四句雙鬢雪百歲兩家親飲水知官味尋春忘旅貧  
可能稱幸草差免喫勞薪逝水傷陳迹知交感宿因奚  
童情宛宛弟子禮恂恂半醉辭華屋深秋望釣輪何時  
宋李雅千萬買芳鄰

謝趙黎村徵君治病卽以送別

當時同日賦長楊廿載賓鴻過草堂  
白下秋燈明舊雨  
青山花影澹重陽  
元方商長居兒輩中  
壘才多解秘方  
剛是仲宣愁體弱  
苦教秤藥累真長

已將仙露挹靈苗  
便引枝風去碧霄  
活我只因緣有舊  
離君轉恐病難消  
秋深古道詩逾健  
霜滿黃河浪不驕  
倘拜東平憲  
王墓爲言故吏  
趨飄蕭

黎村故簡親王客

出塞圖

陰山風大雪花明  
匹馬沙塲落日行  
漢代邊聲新畫角  
秦時月色古長城  
春寒少婦三更怨  
酒熟陽關萬里情  
笑我封侯無骨相  
不曾青海事功名

病

當階飄落葉我又卧高樓山裏先生病人間天地秋雨  
涼蟬別樹風緊帳嫌鈎尚有關心問梅花補種不

瘧

宋玉悲秋時趙羅疴作候八月乃有凶

余兩次病以八月

三年

拜賜又幾疑彼瘧鬼匪寇乃婚媾初來頭岑岑須臾眼  
黝黝投之深淵些層冰剝膚腠忽而醞鬼侯焚烟相灼  
灸襄陽水正淹赤壁火復茂冰炭各爭強陰陽互掩覆  
如潮不愆期似箭必滿發疑賜牽機藥足前頭欲後豈  
作木居士火穿復水透賊退氛尚惡渙汗如激溜牛勞  
喘更吐黃鐘鳴滿腹淚滴瓊瑰珠夢逐南門味衣帶結



成繩篋髮須劔將強鉏足踣跚考父背偃僕臨期測日  
影擊柝如何寇望赦占災星月蝕如待救十輝窮砥履  
六祝難詛咒我怒呼鬼來大聲與之响汝本黃帝孫暴  
虐乃勝紂景丹古壯士爾已往相疾少陵昔詩人三載  
爾不宥有意病君子吾將上帝奏逐汝伴刑天驅汝出  
狗竇壺冢書鬼名空青摘鬼宿鬼乃跪陳詞公言殊賢  
賢子來爲公迎子去爲公留園中風如刀公獨披襟受  
池中月如霜公帆方曳繡快意禍機積放懷余壽厚匪  
獨此之由求治亦太驟一年二豎來褚醫最地謬柳似  
大金丹襍進如米豆逐虎而閉門倒戈以自鬪陰血遂  
狡偵發癥儼宿瘤一年小作惡呂醫亦莖隨浮脉更升

提心闕聞血艱非鬼亦非疾誰則任其咎公愛讀史書  
奚不覽宇宙漢祖與唐宗大綱憑魚漏寧無水旱災元  
氣仍交妬建元久視年科條漸輻輳桑孔法錙銖周來  
禍結構添眉混沌醜舐糠雞犬瘦身世將毋同公胡勿  
叅究古帝有人皇三萬八千壽其後神農來草根殺老  
幼扁鵲割齊嬰妻子避左右醫師屬冢宰十全更罕觀  
瘡鬼雖併張病人不病歎况公無膏肓寒暑亦邂逅旣  
來莫天闕未來莫俯就勿吞棘刺尤勿恃春秋富新牡  
謹遊房大夫祀中霽示吾杜德機吾去敢留遐願公如  
伯夷念惡勿念舊毋學蜀市人天皇滿背鏤更願如石  
處聞名鬼已走毋學高將軍功臣閣上伏予聞意恍然

如挹淨邱袖幽宗夜九拜朝霞日三嗽逐醫不逐鬼散  
藥如散臭慎以代昌陽和以爲甲冑看花喚都兒伐木  
課辛秀悠悠紅霞嚙坦坦青陽皴上壽何敢期中醫請  
永守

五人墓

窺雲四垂風莽莽銀錯鐵鎖閤門響閤門側目耳向天  
天語不聞聞東廠東廠逮者周先生人不識面聞其名  
九重天子詔安在阿儂此處難橫行李陽老拳一揮臂  
萬手如星撒平地破柱難探逆豎頭披枝且奪元兇氣  
萬人散盡五人存顏馬周楊市井民戴頭笑見高皇帝  
干卿何事徒紛紛從此緹騎不敢狂九千歲事旋消亡

收回匕首知何限抵得彈章更幾行君不見漢孫斌奮  
拳格殺單超吏竟救與先徙朔方又不見唐五王上陽  
宮裏相扶將不與同福同其殃當時高冠若箕數十輩  
子姓跪起如奴仆豈無麒麟三丈護華表早已滌沃躄  
牛羊何人肯奠酒與築五墳纍纍春淒淒三月草長蝴  
蝶飛可惜梁鴻生太早只知穿家傍要離

卽事

三尺清溝手自開引他流水自西來明知東去留難住  
且在儂家過一回  
聽來鳥尚佳音少想見詩吟好句難戲把桃花吹落者  
玉盤盛著當春看

自題

苦被詩書管常驚日影過印貪三面刻墨憤兩頭磨學  
老先扶杖辭官早畏靴賓朋名屢忘偏記古人多

歸舟作

姑蘇買舟白下行柳枝相送桃根迎三日勾留未出城  
一夜春潮打船尾交頸鴛鴦宿被底行盡江南三百里  
篙師呼酒我品茶休驚休喜休嘆嗟順風逆風總到家

寓目卽書

得失人休惱塞翁憑欄不覺笑東風蜘蛛自道張羅巧  
網得飛花誤當蟲

韓昌黎孫袞中狀元而世人不知咏之寄慰魚門

小倉山房

卷十二

七

落第

韓門曾有狀元郎底事無人說短長想見世間公道事  
不將科第當文章

水軒主人招飲月下作

江城秋在酒人家酒對秋光興倍加風定竹呈千个字  
霜高梅孕一身花紅鞭攜出天山雪席間出吟紫菊排  
成錦帳霞半夜風燈送行客滿牆醉影尚欹斜

答孟亭訊梅

寒梅初種後曾與故人期待放一林雪各吟千首詩忽  
來連夜雨凍斷早春枝自是花渝約非關沾酒遲

小倉山房詩集卷十三 丁丑

錢唐袁枚子才

聞叔度少宰復 命軍營寄懷一首

嘗悲隨陸不能武今見終軍能繫虜  
萬里馳歸草奏箋  
白門夾道看裘五裘五貧賤交長安市  
上同遊遊  
一朝致身青雲上華嶽峯高少依傍  
人驚備者亦知兵  
我怪西江還山將 聖朝神武滅高昌  
車鼻窮酋遠遁  
藏馬謖已誅君奭死 朝廷未免憂邊防  
侍郎慷慨臣  
請行十奏九合軍中情王修侍從解機變  
崔浩胸中盡  
甲兵繡衣玉斧南薰殿 詔許千官設華餞  
親解金袍  
賜狄公戎裝強換書生面 一路龍沙持絳節  
交河馬踏

層冰裂刁斗聲飛瀚海雲  
刀光涼動天山雪  
元帥靴邊問  
主安三軍傾耳聽  
籌策屈指瓌闐首  
可傳班超生  
入玉門關拔將銅柱全  
收地獻得金人好  
祭天城南少婦寄征袍  
堂上萱花露正高  
誰知天外揮長劍  
依舊歸心折  
大刀男兒讀史長嘆息  
貂蟬每借兜鍪力  
健士奚須在  
拍張詞臣已見歌勅勒  
天恩朝夕下明堂  
瓌矢彤弓寵未央  
聽說阜陽女兒隊  
添唱從軍樂府章

謂采玉

倣劍南小體詩

春日山居事事宜  
閉門行樂少人知  
亭移舊料功成早  
樹換新泥葉發遲  
禿筆管仍裝麝尾  
斷琴絃更拗花枝  
年來悟得忘名意  
除却風懷不咏詩



春影離離過畫廊送春人與蝶俱忙歌聲隔苑聽尤好  
花氣隨風到始香稚女鳴環爭白紵旁妻獨忿種青棠  
消除長日知何事只有傾心美紫郎

朝烟暮雨倦登臨閒倚危樓憶古今螻蟻尚存封建法  
圍棋時見井田心山花受月紅成白池水如人淺不深  
中散春愁無著處幽蘭開處去彈琴

題李後主百尺樓

黃花水小雨潏潏南國樓臺夕照間如此長江被量去  
當年還唱念家山

檀槽金屑小琵琶姊妹承恩似趙家聽到流珠歌舊曲  
一時腸斷六宮花

保儀不愧女相如手掌牙籤萬萬餘爭奈焚如學蕭繹  
國亡遷怒到圖書

艸艸南朝一夢過游游春雨奈愁何官家賴有重瞳子  
洗面終朝眼淚多

藥號牽機出禁宮此人又似不相容檀來歌罷江山穩  
只合全家哭世宗

六道戈船出上游香孩兒太不風流關心卧榻鼯聲地  
轉忘燕雲十六州

金字心經手自焚命燈竿斷九霄雲無情最是西天佛  
送過蕭梁又送君

千年故國水雲涼樂府歌殘曲數行父老營齋妃薦福







金鞭夜醉西湖月西湖有客正垂髫杵臼相逢遽定交  
雙聲笑徹烟霄上把袂詩歌碧樹高蕭郎騎馬走京華  
公子秋風桂亦花此際烟波人萬里此時別緒字如麻  
流星馬遞泥金紙大父懽呼阿父喜寸厚家書拆忽驚  
當頭只說袁才子袁安躡蹻撲燕塵乞火先投御史門  
鴻博已傳韓愈罷棲身誰念趙岐貧果然屋好烏亦好  
先把牛心啖逸少延譽真同許子將少年我愧蕭淵藻  
大被常教氣類親風懷共取明燈照朝朝索米向長安  
身賤由來作客難子鷺殘炙垂涎處若賜嚼柔幾頓餐  
可憐客路暫逢君君又還家我火羣借馬送行秋夜月  
含愁極目楚天雲會將阮籍窮途淚痛酒半欣白練篇

明年身忝到蓬萊  
驄馬門前玉笛哀  
華屋誰知一朝變  
滄桑從此萬重來  
八十封翁扶櫬歸  
孤兒一隊繞船悲  
鍾君何驚無人嫁  
仲郢烏臺有雀飛  
王郎再應公車試  
往日繁華如隔世  
落第羞看紅杏花  
還鄉怕挽青絲轡  
誰云生死見交情  
任昉見郎局已成  
不學王孫依鮑氏  
甘心慶父抗勳經  
三更孤燕空梁墜  
萬里書燈鬼火青  
城南婦作刀頭夢  
易水風吹變徵聲  
白骨天涯蔓草寒  
招魂誰唱念家山  
回頭酒綠燈紅事  
盡作輕塵短夢看  
記儂奔走江南道  
兩度逢君覺君老  
路遠偏教得信遲  
官卑祇恨酬恩少  
二十年來鬢未霜  
哭君三世淚沾裳  
寢門一奠知何日  
金谷園空宿草荒

哭沈補羅

八法書亡索幼安蘭亭雖在酒壚寒欲知太古先看面  
從未朝天儘作官垂死交情秋握手半生家難老傳餐  
公貌奇古七鬚縣令從誰云遺墨千年貴我是同時得  
未入都老病寄膳以終已難

傷心張耳鬢如絲曾見夷門大會時四海耆英今日盡  
三朝遺事夕陽知風摧漢代靈光殿名重蕭梁老婢師  
最晚逢君備早別淚痕空灑白楊枝

題故人畫

有序

晴江明府畫梅絕奇恒化後人藏者輒屬予加  
墨以晴江之好予也再來叅戎與晴江同姓甚



懽丙子秋引例來請值子病牀皮置高閣主人  
疑予忘之矣今年夏五展卷見梅花如見宿草  
與其上求巫陽不若招魂于紙上爲書一律質  
生者質死者并質之梅花

幾番怕見晴江盡今日重看淚又傾十四幅梅春萬點  
一千年事鶴三更高人魂過山河冷上界花輪筆墨清  
聽說根盤共仙李暗香疎影盡交情

### 春草

江城三月草烟綿有客憑闌感歲年雪後人歸春滿地  
馬頭風起影搖天清明細雨長亭路畫角斜陽南浦船  
欲采蘼蕪歌水調幾回愁過大隄邊

誰家收笛下牛羊踏到襄城舉國狂一片綠成蝴蝶路  
幾叢眠作酒人床印來羅襪春痕軟望去裙腰別恨長  
記得斑駁嘶暮雨青袍今已誤蕭郎

黃鵠一出艷陽歌撩亂春愁起碧波寂寂鳥啼新院落  
萋萋人感舊山河根高自占風雲早物賤偏沾雨露多  
莫怪已芟生轉密此身原要托烟蘿

玉鈎斜月冷黃鵬渺渺寒蕪夕照西青入窮沙頽歷日  
繡完平野尖春泥三生蓬海嗟人老六代雲山燕子低  
說與東風合惆悵剪刀雖好葉難齊

十二瑤階也托根野心只是厭紅塵開花自笑無名字  
采藥時逢有異人恍惚池塘尋舊夢分明書帶認前身

年來似勸天桃隱，遮住漁郎不問津。  
栽培不仗主人翁，自立斜陽自偃風。  
空苑儘教隨意綠，落花借與滿身紅。  
千般甘苦嘗難盡，一扇輸贏鬪易終。  
我欲踏青何處好，琴河西畔板橋東。

咏錢

誰開九府製泉刀，從此黃標又紫標。  
千古帝王留字去，萬般人事讓兄驕。  
椒房手迹傳唐代，堯廟神陰記漢朝。  
莫說仙家最清冷，也須金液上丹霄。

不須薇蕨說高風，到底夷齊是命窮。  
剪紙賄能通鬼國，博梟天尚借劉翁。  
杖頭有處春堪買，坐上無時酒欲空。  
怎怪南唐痴長老，心經一卷寫當中。

人生薪水尋常事動輒煩君我亦愁解用何嘗非俊物  
不談未必定清流空勞姦女千回數屢見銅山一夕休  
擬把婆心向天奏九州添設富民侯

牙籌且莫惱王戎本草嘗來味果濃五福富登洪範傳  
六官人愛大司農分明輸廓無方寸頃刻風波有萬重

怪我緣慳君欲去祇須臨別少從容

張燕公有  
錢本草碑

五銖衣薄稱閒身縮罷銅符早閉門萬選儒憑詞賦力  
半文不受祖宗恩搖空撲滿心原淡獨飲廉泉體自尊  
記得清明分白打開元兩字最消魂

風吹荷葉滿池斜老去持籌敢自夸早買名山非壟斷  
不騎仙鶴也豪華富徒慳守貧何異來得分明去亦嘉

我有青蚨飛處好半尋烟水半尋花

錢稼軒少司空奉命棲霞畫山過訪隨園

司空工作畫 聖主教看山感舊懷殘客穿雲到此間  
高軒紅雨染空谷白駒閒帶我烟霞去仍歸侍從班

梅雨

梅子黃時雨濛濛最不同慣來人意外偏灑日光中滑  
徑愁芒履空堂躍水蟲采蓮差可喜處處畫船通

題柳如是畫像

生綃一幅紅粧影玉貌珠冠方纈領眼波如月照人間  
欲奪鸞篋須絕頂懷刺黃門悔誤投遺珠草草尚書收  
黨人碑上無雙士夫壻班中第二流絳雲樓閣起三層

紅豆花枝枯復生。斑管自稱詩弟子。佛香同事古先生。  
勾欄院大朝廷小。紅粉情多青史輕。扁舟同過黃天蕩。  
梁家有个青樓樣。金鼓親提妾亦能。奈江南不出將。  
一朝九廟煙塵起。手握刀繩勸公死。百年此際盍歸乎。  
萬論從今都定矣。可惜尚書壽正長。丹青讓與柳枝娘。  
靜坐

寄徵士薛一瓢

南海有隱士。疑是青城君。道姓稱黃石。問家指白雲。精  
心通九畧。逸氣橫三軍。棄其孫與子。孤處空江濱。獨携  
天台女。飄飄金霞裙。梅花開玉牕。衆仙時一醺。我亦風

其間芳訊聞氤氳無端自謫落從茲仙凡分風車不可  
馭元理無由問何時青鳥來同驂鸞鶴羣

妹夫胡書集作宰什方遠貽川緝感而成咏用答

高情

一紙家書萬里情八年人老杜鵑聲胡威贈絹知蠶好  
薛女題箋想政清署外山光爽齒齠馬頭月色錦官城  
韋莊詩集韋臯業珍重郎君蜀道行

讀王荆公傳

青苗幾葉起風塵孤負臯夔自待身底事經神有緣法  
周官偏誤姓王人

齒痛

百年過四旬老狀一齊赴但願無所苦聾盲任所付惟  
茲齒兩行朝夕待汝哺相鼠尚有牙飛鳥豈無隙編排  
三十二落落晨星布隊缺衆乃搖左移右不固忽弱一  
个焉墳起血沮洳臨食輒三嘆呼譽每百度投梭繡益  
悲激石礪如鋸似屐入門折爲牛孺子仆元謨眉不伸  
丞相茵屢吐類炙寸重艾勝飲三斗醋說士不覺甘噉  
名亦無趣調語便聾牙反唇如有訴徒搖子公指愁對  
亞夫箸噬嗑爲已占大烹向人如跪跪起復行呻吟朝  
至暮五漿三飯時隙罅難調護狼藉小穉穉如入大盈  
庫已困楚人釘復作黨人捕急命大老嫗發難學罷錯  
金鑿爲戈矛冰麝爲俞跗蠕蠕黃頭蟲擒出竟無數客



容旣甚猛尸汝猶可怖譬如漢宦官雖誅國已蠹次日  
嚼復嚼痛止齟恰腐又如買臣妻苦留終欲去欲去未  
去間勃谿終日怒咄哉汝朽骨無情心不恕我雖仗汝  
餐汝亦得我助弱冠啖紅綾韶光不汝誤有時拈花笑  
莞爾將汝露談天吐玉屑觀畫設寒具似我作居停將  
子亦母教胡爲憎酸鹹瓜葛全不顧三餐自作孽四十  
已見惡其餘編貝公效尤更可慮勸齒學宰相伴食且  
餐素母學小丈夫悻悻不肯住更學古君子絕交須念  
故母學暴富兒登時棄瓦注叩汝一千回賜汝三日醮  
吾將鳴天鼓更請黃帝鑄

偶然作

三寸鼠鬚筆千秋爭名家譬如一鮒魚而祝穀百車參  
軍圖作佛母乃願太奢可奈日與月已如赴壑蛇傳名  
無竹帛成仙無丹砂賴此文字間著作爲生涯後入就  
知我卑卑已可嗟萬一再蹉跎輪迴可恃耶

山居無所事遁木復遁土東聽繩繩築西聞丁丁斧三  
百有六旬所費亦難數戚里憐我貧切切相規阻豈知  
君子心此中國有主未能議明堂爲國造區宇又無厦  
萬間寒士同安堵就此蝸牛廬結構且楚楚起伏寓文  
心疎密占隊伍栽花如養民建亭似開府可惜錢刀空  
英雄難用武始知諸葛公糧盡退軍苦  
讀書不手記一過無分毫得句忽然忘逐之如追逃見

書如見色未近已心動只恐橫陳多後庭曠者衆所以  
某日觀手自識其腦能着幾縷屐此意亦苦惱  
身無活人權不憂溺與飢身無効人權莫談是與非當  
時石戶農牽羊海上避耿耿方寸間隱隱萬言論願揖  
衆舉夔待儂見堯舜

顏回無宣尼一瓢何足筭宰相三十年雖庸有列傳君  
子愛其名名權非我擅但看十七史遜我者大半

太上貴道德其次務施報惟其本此心所以有忠孝快  
哉孔聖人報怨稱直道英雄萬念灰此意終了了矧吾  
少也賤恩仇豈云少逝者已如斯前途惟有老再拜漂  
母祠涕泣傷懷抱

開卷見古人開門見今人古人骨已朽情性與我親今人乃我類嚼蠟聞語言寧與木石居不與俗子俱欲見何代人但翻何代書

平生多嗜欲所惜惟枵菹酒味與絲竹勉強相支吾其餘玩好類目擊心已慕忽忽四十年味盡返吾素惟茲文字業兀兀尚朝暮晨起望書堂身如渴覓赴高歌古人作心覺蛾眉妬自問子胡然不能言其故

憶昔垂髫年讀書葵巷中先生出見客弟子偷餘工聞客有科名仰之如華嵩家人多窺採嘖嘖羨其容于今二十年都成可憐蟲孝廉難餬口進士愁飄蓬酒味減京口米價增江東貴爵而尚齒吾將笑周公

東漢舉孝廉四十方辟召吾年正四十自覺已衰老問  
其所以然入世嫌太早新勞脂易枯刀用鋒恒少傷哉  
出山時意氣凌八表一自識行藏不復恥溫飽何圖大  
鵬翼化作小山草懶惰便清高巢由安足道

悲哉秋爲氣草木凜若霜我身非孤桐逢秋如探湯又  
如古塞上防秋羽檄忙六年三大病八月之中央自知  
疎狂性肌骨多開張忽受金風歛相戰何能降吹髮卽  
飢噉藥石難周防長跪奏白帝臣請召雲將共留東皇  
駕熙熙遊春陽母使一葉落惹我寸心傷其旁有宋玉  
涕下沾衣裳

汝賤非汝拙汝貴非汝才不能領此意青天生禍災禍

福何足論所惜九重恩萬世一時遇而無雲雷屯顏駟  
用太遲終軍用太早所以漢家業人才多草草  
聖人重躬行不以道自拘其治貴清平科條簡且踈唐  
虞至商周一千年有餘治民無多談傳心無異趨但有  
謨詰語而無官禮書六經盡糟粕大哉此言歟周末始  
文勝漢興廣徵儒遂有叔孫通縣叢野外居更有魯徐  
生習禮爲大夫瓊瓊角毛鄭空空談程朱求之日益嚴  
失之日益迂未必兩廡坐果然聖人徒未必兩廡外都  
與聖人殊聖人不復生我夢終遼遼

聞雷

六月雲雷盛霹靂西南郊震殺一田夫其隣何曉曉道

是無惡狀蒼蒼刑罰偏我往謂其隣爾母言逆天天生  
復天殺於汝何尤焉隣曰大不然人心如其面于心有  
不安父母貴幾諫晉獻殺申生春秋有貶辭宣王誅杜  
伯左儒請死之三槐與九棘要使天下聞雷雖象其背  
模糊不成文謂是前世孽前生天夢夢謂有隱慮焉曷  
不示之衆擊牛不擊虎勝之不爲武擊賤不擊貴雷乃  
勢利祖巍巍真宰心與人異好惡兩師與風伯胡不救  
其誤予聞隣翁語惻然不能言死者良已矣無人招其  
魂

美人彈琴圖

今夕何夕銀河明單鳧寡鶴升天行幽蘭花開碧雲斷

美人獨坐難爲情一張青琴當郎抱不肯無人輕有聲  
疑是卓文君彷彿趙飛燕義髻濃梳洛水粧烟華搖蕩  
香雲鬢織罷流黃手爪傷久疎雲雨朱絃變蕩子去關  
山鳥啼蕙草殘孤鶯欲作語對鏡發長嘆不愁明月空  
床冷只恨陽春識曲難何處分釵王敬伯何時按拍董  
廷蘭北斗離離挂寒碧妾心宛轉與琴訣一片瀟湘指  
上波萬重幽澗花間雪彈畢還將古錦包曲終不覺衣  
裳濕四絃三調本淒涼琴語琴心暗裏藏只描一幅相  
思態寄與千秋播播郎

寄懷歸愚尚書

天與高年享重名明經晚遇比桓榮詩人遭際無前古



海內風騷有正聲白髮歸來雙俸重青山題罷

廣戴公園上書衙處更命春官典六卿

曾拖金紫侍東宮鶴禁龍樓獻樸忠斥去邪蒿開苦口

折來楊柳勸春風賀循印綬恩方溼疏廣都門餞已終

今日商山好芝草青青猶照夕陽紅

金鑾殿上咏霓裳三次同年夢最長

鴻詞科吳郡聲聞

張子布鏡湖風月賀知章傳人自古前生定酒客於今

舊雨涼何事蒲輪遊白下不來小住說滄桑

黎生鶴髮捧雙魚寄得昌黎薦士書

公以書薦闕人黎良行老去

心情真健在秋來杖履更何如愁生蕭寺雲飛處露下

橫塘雁到初記否隔年河朔飲張南周北又離居

奉和揚州盧雅雨觀察紅橋修禊之作

雷塘七里小橋紅  
隋苑烟花閨苑同  
天子停鑾留勝蹟  
大夫修禊采南風  
黃金宮闕連雲起  
白塔毫光照月空  
二十重春萬層景  
牙牌標出水西東

紫竹亭西歌吹聞  
傾城車鬪笛紛紛  
楊花風散春隄雪  
水面燈涼日暮雲  
蕩子黃驄金縷曲  
女兒高髻藕絲裙  
人間此後淪明月  
未必揚州只二分

歐蘇當日擅風流  
重整駢壇五首秋  
四面雲山新水榭  
六朝歌管舊春愁  
人騎仙鶴尋詩社  
月送笙簫上酒樓  
莫怪梅花東閣盛  
年來何處領揚州

二月迎 鑾理畫橈  
雨扶筇杖到紅橋  
時非上巳春猶

淺遊過釣天夢未消綠綺琴傳廣陵散青山入隔白門  
潮憑公好取燕城賦畫作屏風寄鮑昭

寄西川方伯徐芷亭同年五十四韻

鵬翼三千里霓裳十九年斯人敦古誼舊雨最周旋飲  
罷江南水恩來蜀道天屏藩龍節重玉斧繡衣鮮帝  
愛文翁化人思邵伯賢道行堪莞爾遠別轉凄然燒尾  
蓬池後回輪弱水前記嘗干日酒同恣一爐烟手學飛  
龍字歌翻樂木篇早朝清漏動月朔課期傳燈借徐吾  
壁街揚祖迹鞭雙樓雜樹側游戲濯龍淵王儉芙蓉幕  
徐陵玳瑁筵有花皆共賞無月不同圓上苑香車闕宮  
袍蜀纈纏通家來姊姒華屋語嬋娟爾我忘形極妻孥

樂事偏爲遲兒繞膝各想妾隨肩濡纈仍呼酒燒蘭更  
擘箋九簪風震盪一日事推遷海沒神山影枝分太華  
蓮我親刀筆吏君督水衡錢喉舌分墨首池塘夢阿連  
相看飛鷁退同作厲人憐俸寄黎陽土書交計吏船人  
天情渺渺精狩意懸懸已見肱三折重鳴鼓兩甄武安  
仍起病樂教再遊燕坎坎能酤我泠泠續撫絃秦關秋  
萬里農部夢三鱣鹿幘仍棲洞貂冠獨聽蟬陸明章貢  
嶺皖口大龍巔草木威名重陽春玉律宣停驂來建業  
訪舊到林泉碧水金鞍照紅旂翠柳牽遠山遙對酒好  
句贈如仙回首釣天夢難忘香火緣松高青似舊瓦賤  
壁難聯論芻相如去推施嚴武專巴渝新舞曲夔府舊

山川叱御驚桐鳳龍街藥杜鵑耶箇盛蒟醬驃鶴闔丁  
零棧道初飄桂新霜正折柏村應儲杞梓德可化鷹鷄  
雨露銀鍾沃功名銅柱竊依然丹禁筆還作太宮椽有  
客南河畔含情北斗邊孤雲心倦矣戴笠意終焉沈氏  
郊居賦方家泊宅編哦松朝掩卷種漆暮鋤田望氣私  
心祝看雲終日眠遙知尋杜甫未免憶焦光朝折終歸  
海風輕只墜鳶何時蔣生徑重地故人崩

二月

二月湘簾漾曉風倚闌人對碧芙蓉春愁不是無形物  
但看楊花一萬重

偶過

偶過青溪上濛濛野水春釣魚竿在地不見釣魚人

海桐書屋卽事

水軒古豪士雅志扶國風萬里遊五嶽一窗栽雙柏慨  
念昔金陵何沈稱宗工千秋少替人誰歟繼其隆遺響  
撞布鼓張旗招雲龍丁丑八月六澹月明高空冠蓋集  
東南華裾飛州虹棋聲答風竹酒氣熏芙蓉秋葵照秋  
士通理協黃中梁園無罰盞謝莊有談功花籌傳未畢  
銅鉢韻已終餘事賦古琴尚論及江東題有琴賦  
魯肅論當今  
聖人詔將詩試南宮善從蓬山謫未忘清廟鐘願與諸  
君子庶歆垂無窮年年對嘉樹永永賦角弓

寄齊學代柬

高城秋未落作客汝先行白髮空山夜青燈獨坐情池  
塘尋遠夢兄弟感來生極目天邊月清光送雁聲

禹貢徐州域相依張建封空樓尋燕子舊幕想芙蓉河  
決城三版官新贖萬重主勞賓可想幾見汝從容

弱冠編詩集彭城與鳳陽馬頭皆楚漢筆底自宮商地  
盡江南界秋高古戰場騷人風骨老強半在他鄉

小草當荆樹分君亦偶然如何絡秀志不結女嬰緣

亭鳳簫女扣扣銀鈿仍繫盈盈月待圓采春囉噴曲空唱

想夫憐

燕姑初徵夢添丁賀者譁偏凋將秀稻又摘早秋瓜老

母堂前勝佳人雨後花風懷吾最遠未免惜年華

方姬  
半產

木葉不知老當秋尚亂飄蟲聲入山大風力出城驕一  
別歲將暮相思路正遙家書最珍重封卷學芭蕉

方姬未大期而免乳意忽忽不樂醫者呂東臯云  
女人望子如秀才之望榜愛其罕譬雅切爲詩謝  
之

蕊榜泥金願久償忽教此恨落閨房天桃子墮花含淚  
紅樹心孤蝶怨霜樂府聽歌康老子燈花偏惱謝秋娘  
多情只有淳于意檢點龍宮賜禁方

吳元理秀才是子罕江寧時所拔董子以詩來謁  
粲然成章喜而有贈

十年不見張童子一卷公然員半千  
饒筆蘭苕花照水



盤空秋隼影橫天  
青山罨酒吾將老  
白下稱才汝最先  
當日門生今小友  
早探金海躡飛仙

熊安亭公子之官楚中以舊時松竹讀書樓冊子

扇題

蕭郎吹笛出南都  
別後離騷有畫圖  
行色君山秋月好  
書聲江左竹樓孤  
詩人慣作州司馬  
神女遙迎楚大夫  
倘采芙蓉花萬朶  
不應忘記白門烏

題李晴洲天際歸舟圖

作客天津未半年  
思歸便畫送歸船  
篙工添上三枝槩  
猶恐春歸在客先

隨園西北有高樓  
樓上長江接檻流  
無數颿檣天際影

八卷上房  
卷一三  
可憐幾箇是歸舟

八月二十九日借溫皆山莊念農遊樓霞

西風愛客作山行  
細雨明朝換老晴  
飲馬後湖秋水色  
迎人前面打禾聲  
遙看高嶺新墻出  
曾過 鑿與大道  
平一路齊梁舊雲物  
銅駝石馬盡關情

晚叩僧門尚未局  
張燈先到話山亭  
峯如赴屋天原巧  
水可流花地忽靈  
九折廊隨幽澗轉  
五層臺隔竹光青  
穿林更有金衣鳥  
啼出秋聲當笛聽

來遲悔過桂花香  
猶記前春去住忙  
隔歲釣天非舊夢  
捲簾紅樹正新霜  
萬松闌健擎雲立  
千佛浮金照影涼  
結構有人心未已  
掉頭私自向斜陽

念農督工樓霞意有改建

回車重上最高峯秋後黃梁萬頃同宮殿忽藏雲世界  
江帆齊出水西東看山到頂心才快待月回身眼更空  
歸去烟霞應滿袖遊人來自半天中

鏡

盈盈一水寫風神惆悵山雞舞罷身望去空堂疑有路  
照來如我竟無人得知宜稱粧應改解其悲懽汝最真  
願取蟠龍安四角滿林花影盡橫陳

簾

珍珠顏色月波光只隔遊蜂不隔香一道疑城花隱霧  
萬條斜竹水成行蓬山珮響仙彌遠深院風停日更長  
搖蕩春痕鈎捲未銜泥燕子待升堂

床

小眠齋裏倦琴書每覺蔡床味有餘  
一夜送人何處去百年分半此中居  
金燈聽鼓應官後紅袖抽簪乍上初  
兩種風情最堪憶梅花吹落水窗虛

燈

別酒淋漓夜雨聲空山紅處野風驚  
並無喜事花長報爲有黃昏色轉明  
歌舞當場春夢短江湖回首玉堂清  
除將書卷裏髮影不領銀缸一點情

扇

齊執巧製愛天工白羽臨江水照空  
小撲流螢花徑外分涼熱客樹陰中  
生無愧面遮寒士秋有餘恩感漢宮

憔悴年年箱篋裏誰知搖手滿懷風

尺

典衣從古屬周官分寸由來熨貼難織布新人休護短  
滿城高髻太嫌寬明堂補袞身猶在大樂調鐘興已闌  
我欲通天臺上表羣才交與此公看

杖

剡水雙藤健絕羣偏於足下最殷勤年來孤往常無路  
海內相扶尚有君小拄心知深淺雪橫拖可逐往來雲  
鄧林豈少狂奔者可奈虞淵日易曛

帳

甲乙流蘇事事非誰傾海水向羅幃垂雲深護鴛鴦穩

越境難防蝴蝶飛  
白鳥有聲喧外陣  
紅燈無力透重圍  
愁他酒盡更殘夜  
遮莫離人獨自歸

香

老去荀郎感歲華  
簷唐粘濕尚成家  
空中仙過靜聞樂  
墻外月明知有花  
雞舌自含芳訊早  
旃檀偏抱逆風塵  
何當盡取懷中字  
燒作青詞上紫霞

和涂長卿秀才九月開牡丹之作

三月繁枝九月抽  
驚看穠艷捲簾鉤  
紫雲題句因紅葉  
青女飛霜到絳樓  
花自過時仍富貴  
天無成見作春秋  
桓榮晚遇顏郎否  
各向尊前掉白頭

十月九日飲江防司馬陳省齋署中坐客汪君吹

簫吳君鼓琴姚君製硯相錯勸觴

碧雲欲墜秋滿天黃花不語含素烟金簫玉琴橫几前  
江州司馬開華筵控糟凍飲酒材全紅虬脯雜元兔肩  
吳剛半醉調朱絃三湘兩峽鳴清泉汪倫弄管銀字圓  
如怨如慕愁嬋娟須臾合奏相接連簫史請後伯牙先  
孤鸞低語老鳳憐水尺未斷水絲牽口所欲轉手亦旋  
角聲不厲羽不偏如雁拍水珠流淵元雲白鶴來翩翩  
主人六十未華顛宛若世外餐霞仙平生妙筆螭龍賦  
今夕何夕勝事聯胡不畫圖海內傳更有姚君琢硯田  
青花紫文開陌阡能將金石蘭亭鐫枚也一技無有焉  
虛此良會心惓惓側聞南齊賜宴年拍張琴舞琵琶邊

別有臣歌封禪篇敬請效尤依古賢含笑獨看郇公箋  
送上元令溫屏山刺通州兼呈其五兄悟仙

聽唱驪歌小雪天一門人別六朝烟思量二十年前事  
早撥朱琴第五絃

斯人風骨最清狂不逐鴛班逐雁行此去通音冀小悟  
萬重海水自宮商

王郎一曲唱初終阿弟旌旗照眼紅始信東山愛絲竹  
官聲不累小安豐

白下風烟接素秋三年鴻爪紀同遊樓霞晚翠青溪雪  
併作離人一段愁

鳳簫二十六韻

鳳故待年女也長而痘痂着面乃  
聘陸姬以乞香亭又復不果在



古將軍聘之篇請行

鮫室泣冰綃泰樓別鳳簫碧天紅線遠法曲紫雲飄玉  
自崑山種珠從合浦招目成初見處姪變可憐宵解誦  
靈光賦纔勝金步搖留仙風裏待按管月中調秋水明  
清唳修篁束細腰近花香轉澹采藥路非遙一日麻姑  
爪三生脂夜妖壽陽梅點點獼髓影蕭蕭灑面雲爲雨  
分香手握椒看春心未滿得隴興仍饒二月始蘇舫江  
東大小喬家雞忘逸少遠水聘雲翹已見新加舊難堪  
暮與朝瓜期遲短滿眉恨鎖長條欲住情終怯將離夢  
復慘鵲鴿情太薄羸螺話空撩竟作烏孫主甘從皂北  
鵬宜城嫁琴客瓊智降弦超俛語吳音斷琵琶塞草凋

卿悲秦吉了我唱董嬌嬈宛轉遺簪戀淒涼舊粉消人  
間無正色花信有鶯鷓願繫他生臂休憎後續貂思量  
主人意海水作春潮

答魚門覆舟見寄

久別青琴海上音忽然彈作水龍吟文章偶有清流禍  
神劍終無化去心長願伊人歌宛在何妨與世暫浮沉  
水經註疏河渠考此後輸君閱歷深

年來聞峴卧烟霞不泛張鷟萬里槎樂府怕歌公竟渡  
輕鳧且傍水爲家

易林鳧雁啞  
以水爲家

天邊酒賀重圓月池上

風驚未墜花聽說寸函隨隻履轉疑龍女愛瑤華

覆舟人書一函

親種

親種橫塘楊柳枝六年人恨采花遲  
關心一搦纖纖手長日章臺竟弄絲

蕭竟適湖州絲買

涼月香燈夢未消青衣作賦請張超  
鳳凰飛去蕭聲遠不管梧桐葉尚搖

樊素歸時淚幾行香山心也費思量  
回頭自顧蒼蒼鬢留與他生願轉長

訪客

夜訪山中客濛濛月色凝敲門人未覺  
仙鶴一聲應